

## TUTÚ CÚÚ ÒÚ NÍ CADÚHA TÉ PÈLÚ

*Té Pèlú cadúha-dé tutú quíhí<sup>n</sup>* ndaha ñáyiú sàndáá iní tnúhu Yá Ndiõxí

<sup>1</sup> Yúhú té Xímú, àdi Pelú chi úú òú-í, xínú cuèchi núú Xítóhó Jesucristú, chi mee-gã ní tendaha ñaha-gá xii-í xícá cùu-í càhá<sup>n</sup>-í tnúhu-gá. Te càdúha-í tutú-a sá cúú-xí nchàa nchohó ñáyiú sàndáá iní ñáhá xii-gá dàtná sàndáá iní-ndí-gá, te duca<sup>n</sup> chi Tătá-ó Dütú Ndiõxí ní dácàhá<sup>n</sup>-gá iní-ó ñí sàndáá iní-ó-gã, chi cùu-gá Yaá ío váha quide ndáá ndíhí Xítóhó Jesucristú Yaá dácácu nihnu ñaha xii-o núú ùhú núú ndàhú. <sup>2</sup> Te xicá<sup>n</sup> táhù-í núú Yã Ndiõxí sá ùu<sup>n</sup>-gá uu<sup>n</sup>-gá ná cuíta chindee chitúu ñaha-gã xii-ndo quíhí<sup>n</sup>, te duca<sup>n</sup> ño váha cuu iní-ndó cùndecu-ndo, te duca<sup>n</sup> càda-gá chi ta cùtnuní-gá iní-ndó nàcuáa ndùu cuendá-gá, te duca<sup>n</sup> ta cùtnuní tucu iní-ndó nchàa nacuáa ndùu cuendá Xítóhó Jesucristú Yaá cúú Xítóhó-ó.

*Nàcuáa quide ñáyiú ndècu ichi Xítóhó Jesucristú*

<sup>3</sup> Te Yá Ndiõxí ío càhnu cuu-gá chi chindee ñaha-gá xii-o quide ndáá-ó ndècu-o datná cuíní mée-gã, te duca<sup>n</sup> chi cùtnuní iní-ó nàcuáa sàni iní Xítóhó Jesucristú Yaá ní càhá<sup>n</sup> ñáhá xii-o. Te òré ní càhá<sup>n</sup> ñáhá-gã xii-o te ní cutnùní iní-ó sã ño càhnu cuu-gá te ío váha quide-gá. <sup>4</sup> Te duca<sup>n</sup> ñí cutnùní tucu iní-ó nàcuáa ní càhá<sup>n</sup>-gá cada ñaha-gã xii-o, te tnúhu ní càhá<sup>n</sup>-gá-á<sup>n</sup> ño càhnu cuu-xi te ío váha, te nchoo ñí sàndáá iní-ó tnúhu-á<sup>n</sup> ñúu xíá<sup>n</sup> ñá túú-gã ndécú-ó ìchi cuehé ichi duha te ni ñà túú-gã sání iní-ó càda-o nándi sá cuèhé sá dúhá, te ní cuu vii ní cuu váha iní-ó vìtna. <sup>5</sup> Te sá dúcá<sup>n</sup> quide-gá te xíá<sup>n</sup> ío nducu ndèe-ndo cada-ndo nchaa nacuáa càhá<sup>n</sup>-í-a, te nchòhó sàndáá iní-ndó-gã dico ñá díú mèe-ni xíá<sup>n</sup> chi

tnàhá xíní ñùhu-xi cada ndáá-ndó cùndecu-ndo. Te núu quìde ndáá-ndó ndècu-ndo te xìni ñùhu-xi tecú tnùnì-ndó tnùhu-gá. <sup>6</sup> Te núu tècú tnùnì-ndó te cùu-ndo ñáyiù xíní cotnii mee-xi, te núu cùu-ndo ñáyiù sàcòo tniì mee-xi te xìni ñùhu-xi cunduu cahnu iní-ndó cuèi nándì sá ná yǎha-ndo cùndecu-ndo, te núu càhnu iní-ndó te xìni ñùhu-xi cada ndáá-ndó cùndecu-ndo datná cuíní méé Yǎ Ndiǒxí cada-ndo. <sup>7</sup> Te núu quìde ndáá-ndó ndècu-ndo, te xìni ñùhu-xi ío cuu iní tnáhá ndì mee-ndo nacuaa ndècu-ndo ichi-gá, te núu cùu iní tnáhá ndì mee-ndo te xìni ñùhu-xi cuu iní-ndó nchàa dava-gá tnàha ñáyiù-ndo.

<sup>8</sup> Te núu sa duca<sup>n</sup> quìde-ndo ndecu-ndo te uu<sup>n</sup>-gá cuita duca<sup>n</sup> càda-ndo quíhí<sup>n</sup> núu cuàhá<sup>n</sup> núu vǎxi, te núu duca<sup>n</sup> quìde-ndo te cùu-ndo cue ñáyiù ñá túú dàna iní-xi xǐndecu, te cuita cutnùnì-gá iní-ndó nchàa nacuaa sàni iní Xítóhó Jesucrìstú quíhí<sup>n</sup>. <sup>9</sup> Te nchaa ñáyiù ñá túú cuíní duca<sup>n</sup> càda cuú-yu ñáyiù ñá túú tnàhí ndìxi túu iní-xi sá Yǎ Ndiǒxí sa ní ndada ndoo ní ndada nine-gá iní-yu cuendá nchaa sá cuèhé sá dúhá nǐ xóo cadá-yu, te ñáyiù-á<sup>n</sup> cúũ-yu dàtná ì<sup>n</sup> ñáyiù cuàá àdi datná ì<sup>n</sup> ñáyiù ñá túú cùtnuní váha núu-xi, te duca<sup>n</sup> sǎtnahá-xi cùu-yu cuendá sá dúcá<sup>n</sup> quìdé-yu. <sup>10</sup> Te xǎ<sup>n</sup> nùu yúhú càhá<sup>n</sup>-í dóho nchaa nchòhó ñáyiù ndècu ichi Xítóhó Jesucrìstú, te ío nducu ndèe-ndo cada váha-ndo cùndecu-ndo cuendá cutnùnì ndáá iní-ndó sǎ Yǎ Ndiǒxí ní cáhá<sup>n</sup> ñáhá-gǎ xii-ndo, te duca<sup>n</sup> nǐ quide-gá chi duca<sup>n</sup> nǐ cachí-gá cada-gá. Te vá ì<sup>n</sup> ndùu cani iní-ndó dàña-ndo ichi-gá, te núu vá dáñá ndéé-ndó càda-ndo nchaa nacuaa càhá<sup>n</sup>-í-a. <sup>11</sup> Te núu duca<sup>n</sup> na càda-ndo cundecu-ndo, te ío vii ío váha cada Yǎ Ndiǒxí quehe<sup>n</sup> cuendá ñáhá-gǎ xii-ndo òré ná sàá-ndó núú ndécú Xítóhó Jesucrìstú táxí tnùnì-gá nchaa nduu nchaa quíú, te diu-ni Yaá-ǎ<sup>n</sup> cúú Xítóhó-ó te ní dácăcu nihnu ñaha-gǎ xii-o núú ùhú núú ndàhú.

<sup>12</sup> Te duca<sup>n</sup>-ni quèhi-í dandàcu iní ñáhà-í xii-ndo nchàa tnúhu càhá<sup>n</sup>-í-a cuèi sa xini-ndó tnúhu-á<sup>n</sup>, te cuèi sàndáá váha iní-ndó nchàa tnúhu ndáá dácua<sup>n</sup>ha-ndo. <sup>13</sup> Te yúhú quidé cuendá-í sá ïo tàú-xi cáhá<sup>n</sup>-í dóho-ndo ñini ndecu-í ñuyú-a cuendá sá vǎ nácua<sup>n</sup>aa-ndo nacuáa cada-ndo cùndecu-ndo. <sup>14</sup> Chi Xítóhó Jesucristú ní cachí-gá sá ñà túú-gǎ vai nduu cundecu-í ñuyú-a te cuú-í. <sup>15</sup> Te ío nducu ndè-í nducu-í nácua<sup>n</sup>aa cada-í cuendá quendóo ndi<sup>n</sup>hi-ndo nchàa tnúhu càhá<sup>n</sup>-í-a, te cuèi na yǎha cuú-í dico vá nácua<sup>n</sup>aa-ndo cada-ndo nchaa nacuáa càhá<sup>n</sup> tnúhu sá dánèhé ñáhà-í xii-ndo vitna.

*Cue tée ní xini núú sǎ ïo càhnu cuu Xítóhó Jesucristú*

<sup>16</sup> Te sa ní dánèhé ñáhà-ndǐ xii-ndo sǎ ïo càhnu cuu Xítóhó Jesucristú. Te ní cachí tnúhu tucu-ndǐ nácua<sup>n</sup>aa cada-gá òré quixi tucu-gá, te tnúhu-á<sup>n</sup> cúú-xí tnúhu ndáá cuiti te ñá díú tnúhu sá ñǐ sani iní cue ñáyiu ñuyú-a cùu-xi, chi nchúhú ní xini núú-ndǐ nácua<sup>n</sup>aa ní quide-xi cút-nàhá ní cutnùni iní-ndǐ sá ïo càhnu cuu Xítóhó Jesucristú. <sup>17</sup> Chi dàvá-á<sup>n</sup> ïo váha ní quide Tǎtá-ó Dútú Ndiǒxí ní quide càhnu-gá Xítóhó Jesucristú, te diu-ni dàvá-á<sup>n</sup> ñǐ cáhá<sup>n</sup> Dútú Ndiǒxí ndéé andiu ñǐ xáha<sup>n</sup>-gǎ xii Xítóhó Jesucristú: “Yòhó cúú-n Dèhe-í tée ío cùu iní-í, te ío cùdíí ìni ñáhà-í xii-n”, duha ní xáha<sup>n</sup> Yǎ Ndiǒxí xii Xítóhó Jesucristú. <sup>18</sup> Te nchúhú ní tecú dóho-ndǐ ní cáhá<sup>n</sup> Yǎ Ndiǒxí ndéé andiu cùtnàhá duca<sup>n</sup> ñǐ xáha<sup>n</sup>-gǎ xii Xítóhó Jesucristú, chi tnàhá-ndǐ ndécú-ndǐ ndi<sup>n</sup>hi-gá yucu núú dúcá<sup>n</sup> ñǐ quide càhnu ñaha Yá Ndiǒxí xii-gá.

<sup>19</sup> Te ndècu ndi<sup>n</sup>hi-o nchaa tnúhu ní cáhá<sup>n</sup> cue tée ní xóo cáhá<sup>n</sup> tnúhu Yá Ndiǒxí ndéé sanaha te nchaa tnúhu-á<sup>n</sup> càhá<sup>n</sup>-xi nchaa nácua<sup>n</sup>aa cada-xi vitna, te cùtnuní iní-ó sǎ tnúhu ndáá cúú-xí, te xini ñuhu-xi cada cuendá váha-ndo nchàa nacuáa càhá<sup>n</sup> tnúhu-á<sup>n</sup>, chi tnúhu-á<sup>n</sup> cúú-xí dàtná ñ<sup>n</sup> ñuhú dáyèhé-xi ndéé òré véxi túndaá quéné chòdíní

cáhnú dàyehe-di. Te duca<sup>n</sup> sàtnahá-xi cùu tnúhu-á<sup>n</sup> chi quìde-xi nacuáa cutnùní iní-ó cuèndá Xítohó Jesucristú.  
<sup>20</sup> Te xìni ñuhu-xi sá ïo-gá cada cuèndá-ndó sã ñà túú ñãyiú tecú tnùní ni ì<sup>n</sup> tnúhu sá ñí chídó tnùní cue téé ní cáhá<sup>n</sup> tnúhu Yá Ndiöxí ndéé sanaha, te núu Yá Ndiöxí vá cádá-gã nàcuáa cutnùní iní-yu nàcuáa càhá<sup>n</sup> nchaa tnúhu-á<sup>n</sup>. <sup>21</sup> Te cue téé-á<sup>n</sup> ïo ní xíndecu yíñuhu-güedé núú Yã Ndiöxí, te nchaa tnúhu sá ñí cáhá<sup>n</sup>-güedé-á<sup>n</sup> ñà túú cùu-xi tnúhu sá ñí cahu iní méé-güedě, chi Espiritú Yã Ndiöxí ní dácáhu ìní ñáhá-xí xii-güedé nàcuáa cunduu tnúhu cáhá<sup>n</sup>-güedé.

## 2

*Cue téé càchí sá càhá<sup>n</sup>* tnúhu Yá Ndiöxí te ñã ndàá

<sup>1</sup> Te ndéé sanduu chi ní xíndecu cue téé ní xóo dandàhú ñáhá xii ñáyiú isràèl càchí sá càhá<sup>n</sup> tnúhu Yá Ndiöxí te ñã ndàá sá càhá<sup>n</sup>-güedé tnúhu-gá, te ñi-ni duca<sup>n</sup> tùcu cundecu cue téé dandàhú ñáhá xii-ndo vitna, chi cachí-güedé sá càhá<sup>n</sup>-güedé tnúhu Yá Ndiöxí te ñã ndàá. Te cue téé-á<sup>n</sup> ïo yídáhu cáhá<sup>n</sup>-güedé, te nchaa tnúhu cáhá<sup>n</sup>-güedé-á<sup>n</sup> dacuíta nihnu ñaha-xi xii-ndo te núu na tédóho-ndo, chi cue téé-á<sup>n</sup> vã ññuu-güedé sá Xítohó Jesucristú ní xíhí-gá cuèndá-güedé. Te sá dúcá<sup>n</sup> càda-güedé ío-gá ndíhi dacuíta nihnu-güedé méé-güedě. <sup>2</sup> Te vài ñáyiú xínu iní-yu cadá-yu nándi sá cuèhé sá dúhá cuèndá sá dúcá<sup>n</sup> càda cue téé-á<sup>n</sup>, te cuèndá xíã<sup>n</sup> ngóo ñáyiú cáhá<sup>n</sup> úhú-yu cuèndá ichi Yá Ndiöxí. <sup>3</sup> Te mee-ni tnúhu sá ñí cahu iní cue ñáyiú ñuyúú-a danèhé ñáhá-güedě xii-ndo, te que-saha-güedě sá cúú-xí tnúhu ndàá te ñã ndàá cuèndá-ni sá cuãñaha-ndo díhú<sup>n</sup> xii-güedé, chi ñi-ni xíã<sup>n</sup> tnàhí cuhu<sup>n</sup> iní-güedé, dico Yá Ndiöxí sa ní cunaha ndècu túha-gá cuèndá cada ndàá-gá cuéchi-güedé, te na sàá nduu te

cuíta nihnu duu<sup>n</sup>-güedé, chi Yá Ndiöxí vá nácua<sup>n</sup>aa-gá ì<sup>n</sup> sá ñ cachí-gá cada-gá.

<sup>4</sup> Te Yá Ndiöxí ñá túú ní quide cahnu iní-gá sá ñ quide cue espíritú ñá túú ní cuiní cada ndáá xínú cuèchi núú-gă ní cùu, chi ní dáquìhí<sup>n</sup> ñáhá-gă xii-xi ì<sup>n</sup> xichi núú ïo ndòho-xi ndecu-xi, te xía<sup>n</sup> cundedí nihnu-xi ndéé sáá nduu cuíta nihnu duu<sup>n</sup>-ná-xi. <sup>5</sup> Te Yá Ndiöxí ñá túú ní quide cahnu tucu iní-gá nchaa sá ñ quide ñáyiu ñuyíú dǐhna, chi dává-á<sup>n</sup> ñ dándáá-gă ndute ñuyíú ñ cáhá nchaa ñáyiu ndècu ichi cuehé ichi duha te ì<sup>n</sup>dii-ni té Nöé ndihí úsá-gá tucu cue ñáyiu cùu ndi mee-dé ní dácăcu nihnu-gá. Te té Nöé-ă<sup>n</sup> cúú-dě tée ní cáhá<sup>n</sup> dóho-yu năcuáa cada váha-yu cundecú-yu ni cùu te ñá túú ní cuiní-yu. <sup>6</sup> Te Yá Ndiöxí ní dăngává-gă ñuhú ní dánáá-gă ñáyiu ñuú Sòdomá ndihí ñáyiu ñuú Gòmorrá te mee-ñá yáá ñ nduu ñuú-á<sup>n</sup>. Te sá dúcá<sup>n</sup> ñ cuu xǐă<sup>n</sup> cútñuní iní-ó năcuáa cada ñaha Yă Ndiöxí xii nchaa ñáyiu ñá túú quide váha. <sup>7</sup> Dico té Löt tée ní quide ndáá ní xíndecu ì<sup>n</sup> ñuú-á<sup>n</sup> dává-á<sup>n</sup> chi ní dácăcu nihnu ñaha-gă xii-dé. Te nchaa ñáyiu ñuú núú ñ xíndecu-dé-á<sup>n</sup> ïo ní xínduu cuihna iní-yu, te mee-ni ìchi dǐí iní ní xíndecú-yu, te sá dúcá<sup>n</sup> ñ xóo cadá-yu xǐă<sup>n</sup> ío ní ndíhú iní té Löt. <sup>8</sup> Te ì<sup>n</sup> nduu ì<sup>n</sup> nduu ní xóo cada ndàhú-xi iní té Löt-á<sup>n</sup> cuendá nchaa tnúhu cuèhé tnúhu duha ní xóo cáhá<sup>n</sup>-yu ní xóo cundedóho-dé, ndihí cuendá nchaa sá cuèhé sá dúhá ñ xóo cadá-yu ní xóo quini-dé, te mee-dě ní cuu-dé ì<sup>n</sup> tée ní xínduu vii ní xínduu váha iní-xi núú Yă Ndiöxí. <sup>9</sup> Te sá dúcá<sup>n</sup> ñ yáha té Nöé ndihí té Löt, xǐă<sup>n</sup> cútñuní iní-ó să Yă Ndiöxí ío chindee-gá cue ñáyiu quide ndáá ndécú ìchi-gá cuendá sá vă cadá-yu nándi sá cuèhé sá dúhá cuèi nándi na ndòhó-yu cundecú-yu. Te Yá Ndiöxí cächí-gá sá ncháá ñáyiu ndècu ichi cuehé ichi duha sa ndècu túha-yu sá quìhí<sup>n</sup>-yu núú ùhú núú ndàhú nduu nà yáha cundáá

cuéchi-yu.

<sup>10</sup> Te uu<sup>n</sup>-gá cada ñaha Yă Ndiöxí xii nchaa cue téé ndècu ichi dǐí ìní, te dàquee tíhú-güedě nchaa tnúhu sá sánú ìchi ñaha xii-o nacuaá cada-o cùndecu-o, te cùu-güedé cue téé ñíí ìní-xi, te yii ìní-güedé, te ñá túú yùhú-güedé cáhá<sup>n</sup> úhú-güedé cuendá nchaa espíritú cúnúu. <sup>11</sup> Te cue espíritú xínú cuèchi núú Yă Ndiöxí ío cùnúu-xi dacúxí cuè téé-á<sup>n</sup>, dico ñá túú cùyii-xi cáhá<sup>n</sup>-xi dàtná càhá<sup>n</sup> cue téé-á<sup>n</sup> òré ndàcá<sup>n</sup> cuéchi-xi núú Yă Ndiöxí cuendá nchaa sá quidé cuè espíritú cùndìhi yucu ñávaha.

<sup>12</sup> Te nchaa cue téé dandàhú ñáhá xii-ndo-á<sup>n</sup> cúu-güedě dàtná cue quiti, chi cue quiti-á<sup>n</sup> ñă túú ndècu sá xìní tnúní-güedi, chi cue quiti-á<sup>n</sup> ñă cacu-güedi sá tníí-ó-güedi te cahni-o-güedi. Te duca<sup>n</sup> sãtnahá-xi cùu nchaa cue téé-á<sup>n</sup>, chi càhá<sup>n</sup> cuèhé-güedé cuendá ndédani càa espíritú cuèi ñá túú xìní-güedé ná espíritú cúu-xí, te diu-ni mee-güedě dácúita nihnu-güedé méé-güedě sá dúcá<sup>n</sup> quide-güedé, <sup>13</sup> te sáá nduu te nacháhu-güedé nchaa sá quidé-güedě-á<sup>n</sup>, te cuèi nduu cuèi niú cúdǐí ìní-güedé quidé-güedě nchaa núú sã cuèhé sá dúhá sàni ìní-güedé. Te òré nàtacá-ndó càda-ndo ì<sup>n</sup> vico chiñuhu-ndo Yá Ndiöxí te chitnahá ñáhá-güedě xii-ndo, te cada dusa<sup>n</sup>-güedě sá cúdǐí ìní-güedé sá dándàhú ñáhá-güedě xii-ndo, te dícó sácá<sup>n</sup>-núú cuăha ñaha-güedě xii-ndo dùca<sup>n</sup> na cada-güedé.

<sup>14</sup> Te nchaa cue téé-á<sup>n</sup> òré xìní-güedé ì<sup>n</sup> ñáyiu dǐí te ndǐhi-ni sàni ìní-güedé cáhá<sup>n</sup> ndǐhi ñaha-güedě xí-yu, te ñá túú ndùu vétú ìní-güedé cuendá nchaa sá cuèhé sá dúhá quide-güedé chi uu<sup>n</sup>-gá uu<sup>n</sup>-gá sání ìní-güedé cada-güedé. Te cuáhá<sup>n</sup>-güedé dándàhú-güedé nchaa ñáyiu ñá túú nihí ndéé càda ndáá cuendá canchicú<sup>n</sup> nihnú-yu nchaa tnúhu càhá<sup>n</sup>-güedé. Te mee-ni nchaa

sá ndécú ndíhi tnahá ñáyiú-güedé cúú ìní-güedé, te cue tée-á<sup>n</sup> cúú-güedé cue tée duu<sup>n</sup> duu<sup>n</sup> sa ní xíta nihnu núú Yá Ndiöxí. <sup>15</sup> Chi cùu-güedé cue tée vá cání-gǎ ìní-xi cada ndáá, te nchìcú<sup>n</sup> nihnu-ná-güedé quídé-güedé nàcuáa ní xóo cada ndíi Bàlaám déhe ndíi Bèór, chi ndíi Bàlaám-á<sup>n</sup> nǐ xóo tnahá ìní ndíi cada ndíi chiú<sup>n</sup> cuehé nàcuáa ní xóo níhí ndíi díhú<sup>n</sup>. <sup>16</sup> Te Yá Ndiöxí ní quide-gǎ ní cáh<sup>n</sup> búrru ndíi ní tenàà ñáhá-dí xii ndíi cuendá sá vǎ cadá ndíi ì<sup>n</sup> cuéchi sàni ìní ndíi cada ndíi ni cùu. Te sá dúcá<sup>n</sup> nǐ cuu xǎ<sup>n</sup> ní nguítuu ndíi ñá túú ní quide ndíi ì<sup>n</sup> sá ñà túú nàndíhi sàni ìní ndíi ni cùu.

<sup>17</sup> Te nchaa cue tée duca<sup>n</sup> xǐquide cùu-güedé dàtná ì<sup>n</sup> doco yìchí, te cùu tucu-güedé dàtná ì<sup>n</sup> vícò sǎ xídó tǎchí te ñá túú dǎu nchídó-xí, te sa ndècu túha ì<sup>n</sup> xichi núú òo nee quíhí<sup>n</sup>-güedé cundecu-güedé ni caa ni quíhí<sup>n</sup>. <sup>18</sup> Te cue tée-á<sup>n</sup> cáh<sup>n</sup>-güedé dàtná cáh<sup>n</sup> ì<sup>n</sup> tée ío cùu cahnu dico ñá túú vèdana nàndíhi nchaa tnúhu cáh<sup>n</sup>-güedé, te cue tée-á<sup>n</sup> dándàhú-güedé nchaa ñáyiú íchí nǐ dáñá ìchi cuehé ichi duha, te xǎha<sup>n</sup>-güedé xií-yu sá cúú-ní cadá-yu nchaa sá cuèhé sá dúhá quide nchaa ñáyiú ndècu ichi díí ìní, <sup>19</sup> te xǎha<sup>n</sup> tucu-güedé sá cúú-ní cadá-yu nání véxi ìní-yu cuèi sá vǎha te cuèi sá cuèhé, dico mee-güedé chi mee-ni sǎ cuèhé sá dúhá cùnuu quide-güedé. Te nchaa ñáyiú ñá ndácú dàña nándi sá cuèhé sá dúhá cúú-yu dàtná ì<sup>n</sup> ñáyiú xínu cuechi ñá túú tnahí dàña quee núú chíú<sup>n</sup> pàtróó<sup>n</sup>-xi. Te duca<sup>n</sup> sǎtnahá-xi cùú-yu chi ñá ndácü-yu dàña-yu nándi sá cuèhé sá dúhá quide-yu. <sup>20</sup> Te núu ñáyiú sa ní dáñá nchàa ichi cuehé ichi duha cuendá sá nǐ cutnùní ìní-yu nàcuáa ndùu tnúhu Xítohó Jesucristú, Yaá ní dácǎcu nihnu ñaha xii-o núú ùhú núú ndàhú ná nànchocáva ìní-yu cundecu tucú-yu ichi cuèhé ichi duha, te mee-nǎ sá cuèhé sá dúhá tàxi tnuní ñáhá-xí xí-yu, te núu duca<sup>n</sup> te vǎa-gǎ tucu cadá-yu dàcúxí dàtná ní

xóo cadá-yu cútnàhá vátá cútnùní-gá iní-yu nàcuáa ndùu tnúhu-gá. <sup>21</sup> Te váha-gá sá vǎ ngǔnu ichí-yu ichi ndáá ní cùu te ñá díú sǎ sà ní ngúnu ichí-yu te ní dáñǎ-yu nchaa tnúhu-gá sá sà ní níhǐ-yu ndècu ndìhí-yu sànu ichi ñaha-xi nacuáa cundecú-yu ni cùu. <sup>22</sup> Te ñáyiú duca<sup>n</sup> xǐquide quèe ndáá-xi nàcuáa cuáhá<sup>n</sup> ì<sup>n</sup> cuèndú sá càchí-xi: “Iná ní nacaxi-dì sá nǐ ndusa<sup>n</sup>-dì, te cùchí quiti íchí nǐ xichi ndute càndoo cuáhá<sup>n</sup>-ni tucu-dì cuchi ñuhu-dì núú ndèhyú”, duha cuáhá<sup>n</sup> cuèndú-á<sup>n</sup>.

### 3

#### *Xítóhó Jesucristú quixi tucu-gá*

<sup>1</sup> Te nchaa nchòhò ñáyiú ío cùu iní-í cùtnuní iní-í sá ìo váha sàni iní-ndó, te xéhé cúú-xí tùtú cúú ùú cadǔha-í sá cúú-xí-ndó, te ì<sup>n</sup>-ni càhá<sup>n</sup>-í dándàcu iní ñáhà-í xii-ndo nchàa tnúhu sá sà ní xíndedóho-ndo. <sup>2</sup> Chi cuiní-í sá vǎ nàcuànaa-ndo nchaa tnúhu ní càhá<sup>n</sup> nchaa cue téé ní xóo càhá<sup>n</sup> tnúhu Yá Ndiǒxí ndéé sanaha, te ni vǎ nàcuànaa-ndo nchaa tnúhu ní càhá<sup>n</sup> cue téé ní càhá<sup>n</sup> tnúhu Xítóhó Jesucristú Yáa ní dácàcu nihnu ñaha xii-o núú ùhú núú ndàhú, chi ñiu nchaa tnúhu-á<sup>n</sup> sánú ìchi ñaha-xi xii-o nacuáa cada-o cùndecu-o.

<sup>3</sup> Te ío-gá xíní ñùhu-xi cutnuní iní-ndó nàcuáa cada-xi òré vátá sàá-gá nduu quixi tucu Xítóhó Jesucristú ñuyíú-a, te càchí tnúhu-í xii-ndo sǎ cùndècu ñáyiú cuhu<sup>n</sup> iní mee-ni nchàa sá cuèhé sá dúhá te mee-ni xǎ<sup>n</sup> cadá-yu, te càhá<sup>n</sup> cuèhé càhá<sup>n</sup> duhá-yu cuèndá tnúhu Yá Ndiǒxí.

<sup>4</sup> Te cachí-yu: “Ñá ndáa sá quixí Xítóhó Jesucristú ñuyíú-a, chi núu quixi-gá te sá ndéé ama-gá sa ní quexìo-gá ní cùu. Te dàtná-ni quide-xi vitna ñiu-ni duha ní quesaha-xi quide-xi ndéé cútnàhá ní ngáva ñuyíú, te ñiu-ni duha quide-xi ndéé cútnàhá ní xíndecu cue ñaní tnáhá-ó ndéé sanaha, te ñiu-ni duha quide-xi ndéé ní sáá nduu ní xíhí-güedé, te ñiu-ni duha quide-xi ndéé vitna”, duha



cáhá<sup>n</sup>-yu. <sup>5</sup> Te ñucù<sup>n</sup> cadá-yu vá cadá cuendá-yu sá Yă Ndiöxí ní cáhá<sup>n</sup>-gá te ní ngúndecu andiũ ndihi ñuyú<sup>u</sup>-a, te diu-gá ní quide ní quene ñuhu yìchí xítí ndute ní ngúndecu-xi ñ<sup>n</sup> xio. <sup>6</sup> Te ñ<sup>n</sup> xito ní dándáá Yă Ndiöxí ndute ñuyú<sup>u</sup>-a ní dánáá-gă nchaá sá íó. <sup>7</sup> Te Yá Ndiöxí ní cachí-gá sá cúndecu-ni ñuyú<sup>u</sup>-a ndihi andiũ ndéé ná sàá nduu càda-gá nchaá nàcuáa ní cáhá<sup>n</sup>-gá sá cúú-xí nchàa ñáyiu ndècu ichi cuehé ichi duha, te dàvá-á<sup>n</sup> danàa-gá nchaá ñáyiu-á<sup>n</sup> chi cáyú andiũ ndihi ñuyú<sup>u</sup>-a.

<sup>8</sup> Te nchaá nchòhó ñáyiu ío cùu iní-í, ío cuhu<sup>n</sup> iní-ndó tñuhu na càhá<sup>n</sup>-í-a, chi Yá Ndiöxí ñá túú sàni iní-gá dàtná sání iní méé-ó, te ñ<sup>n</sup> nduu cùu-xi datná úxí cièndú cuíá, te úxí cièndú cuíá-á<sup>n</sup> cúú-xí dàtná ñ<sup>n</sup> nduu sá cúú-xí-gă. <sup>9</sup> Te Yá Ndiöxí ñá túú dàna ndodo iní-gá vá cadá-gă ñ<sup>n</sup> sá càhá<sup>n</sup>-gá dàtná càchí cue ñáyiu sá dáná ndòdo iní-gá cada-gá ñ<sup>n</sup> sá càhá<sup>n</sup>-gá, chi ñucù<sup>n</sup> tnahí dàcaca-gá nduu cuendá sá ío cùndahú iní ñáhá-gă xii-o, te cuiní-gá sá ncháá ñáyiu ndixi túu iní-yu sá ñà túú quide váha-yu ndècú-yu te tuhá-yu ichi-gá, te duca<sup>n</sup> quide-gá chi cuiní-gá sá vă cuíta nihnu ni ñ<sup>n</sup>-yu.

<sup>10</sup> Te dàtná quidé cuè ñadúhú quñhu-güedé ñ<sup>n</sup> vehe dùhu-güedé òré ñá túú yìhi iní xítohó vehe-á<sup>n</sup>, te duca<sup>n</sup> càda Xítohó Jesucristú chi nduu ñà túú yìhi iní ñáyiu ñuyú<sup>u</sup>-a quixi tucu-gá, te dàvá-á<sup>n</sup> cada-xi andiũ dàtná quidé-xí òré níhi vìhi cahá<sup>n</sup> ññuhu, te diu-ni òré-á<sup>n</sup> ndoñuhu àndiũ, te cáyú nchaá chódíní, te cáyú tucu tnahá ñuyú<sup>u</sup>-a ndihi nchaá sá íó.

<sup>11</sup> Te vitna nchòhó sa xìní-ndó sã náá ñuyú<sup>u</sup>-a te xíá<sup>n</sup> ío xìni ñuhu-xi cada váha-ndo cùndecu-ndo, te cada-ndo nàcuáa cuiní méé Yă Ndiöxí cunduu. <sup>12</sup> Te ío nducu ndèe-ndo duca<sup>n</sup> cada-ndo cuendá duca<sup>n</sup> ndihi-ni sáá nduu càda-gá nchaá nàcuáa càhá<sup>n</sup>-gá, te duca<sup>n</sup> nchòhó cun-

decu túha-ndo sáá nduu-ǎ<sup>n</sup>. Te diu-ni nduu-ǎ<sup>n</sup> ndoñuhu àndiu chi cáyú-xi, te diu-ni duca<sup>n</sup> ndoñuhu tucu nchaa chódíní chi ndihi-di cáyú. <sup>13</sup> Te nchoo ndètu-o sáá nduu cùndecu-o ì<sup>n</sup> ñuyíú sáá, te quiní-ó ì<sup>n</sup> andiu saa datná ní cachí Yǎ Ndiǒxí, te yàcá<sup>n</sup> chi mee-nǎ cue ñáyiú quide váha cundecu.

<sup>14</sup> Te nchòhó ñáyiú ío cùu iní-í, ñini ndètu-ndo sáá nduu dùca<sup>n</sup> cada-xi ío nducu ndèe-ndo cada-ndo mee-ni sá váha cundecu-ndo ìchi Yá Ndiǒxí, te cundecu nahi-ndo, te cada-ndo nchàa nacuáa vá cùndècu cuéchi-ndo nǔú-gǎ.

<sup>15</sup> Te ío cada cuendá-ndó sǎ dàcaca-gá nduu dùca<sup>n</sup> cada-gá chi cuiní-gá sá ncháá ñáyiú naníhí tàhú-yu. Te té Pǎblú tée ío cùu iní-ó ndècu ndihi-o ichi Xítóhó Jesucrístú diu-ni nàcuáa càhá<sup>n</sup>-í-a diu-ni duca<sup>n</sup> ñí tee-dé ì<sup>n</sup> núú tütú ní dáquixí-dě ndaha-ndo, te ní tee-dé nàcuáa ní dácáhú iní ñáhá Yǎ Ndiǒxí xii-dé. <sup>16</sup> Te diu-ni duca<sup>n</sup> càhá<sup>n</sup>-dé nchaa dava-gá núú tütú cádũha-dé, te dava tnúhu càhá<sup>n</sup>-dé ío úhú tecú tnùnì-ó, núu xíǎ<sup>n</sup> ñáyiú ñá túú cùtnuní váha iní-xi, ñáyiú ío yáchí sàndáá iní-xi ì<sup>n</sup> tnúhu, ñáyiú-á<sup>n</sup> tècú tnùnì dátñi-yu nchaa tnúhu ní chídó tnùnì-dé, ndihi nchaa dava-gá tnúhu yòdo tnuní núú tütú Yǎ Ndiǒxí, te sá dúcá<sup>n</sup> quidé-yu te dacũta nihnú-yu mèe-yu.

<sup>17</sup> Te nchòhó ñáyiú ío cùu iní-í, sa cùtnuní iní-ndó nàcuáa quide dava ñáyiú, núu xíǎ<sup>n</sup> ío xini ñuhu-xi quíhi iní-ndó cùndecu-ndo cuendá duca<sup>n</sup> cùndecu-ni-ndo ichi-gá, te vá dáñá-ndó mèe-ndo dandahú ñáhá nchaa cue tée ndècu ichi cuehé ichi duha, chi cue tée-á<sup>n</sup> ñà túú sàni váha iní-güedé cuendá tnúhu Yá Ndiǒxí. Te núu na dàña-ndo mee-ndo dandahú ñáhá-güedě xii-ndo te vá cùndècu váha-gá-ndó ìchi-gá dàtná ndécú-ndó vitna.

<sup>18</sup> Te nchòhó uu<sup>n</sup>-gá uu<sup>n</sup>-gá cuita cutnùnì-gá iní-ndó quíhí<sup>n</sup> nchaa nàcuáa ta chìndee ñaha Xítóhó Jesucrístú xii-ndo cuǎhá<sup>n</sup>. Te duca<sup>n</sup> ÿo-gá cuita cutnùnì iní-ndó nchàa nacuáa sàni iní-gá, te diu-gá cúú-gǎ Yaá ní dácäcu

nihnu ñaha xii-o núú ùhú núú ndàhú. Te chí ná càchí-ó sǎ  
ĩo càhnu cuu-gá cuěi vitna té cuěi ndéé núú cuàhá<sup>n</sup> núú  
věxi. Te duca<sup>n</sup> na cùnduu. Te ío chí cádá ndèe iní-nǎ vitna.

Tnúhu ní cáhá<sup>n</sup> yă ndiöxí xito cùu uú

New Testament in Mixtec, Peñoles (MX:mil:Mixtec, Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Updates

eBible.org

